



UINAT (političarima ovdašnjim)

Kao vječiti optimista koji sve oko sebe redovno uvjerava "da nije baš sve tako crno kao što izgleda", uvijek se obradujem kada neko drugi potvrdi da moj optimizam ima svoje utemeljenje u stvarnosti. Tako sam se poput djeteta radovala kada sam u popularnom hrvatskom nedjeljniku (a priču je prenio i čitani hrvatski dnevnik) pročitala reportažu o firmi *Bekto* iz Goražda. U tekstu simboličnog naslova *Na Drini industrija* hrvatske kolege novinari nisu štedjeli riječi hvale za Redžu Bektu, samozatajnog vlasnika kompanije *Bekto*, njegove tvornice, proizvode, uposlenike... Usput spomenuše i državu opterećenu političkim problemima, korupcijom, ogromnom administracijom. I u toj i takvoj državi kompaniju za primjer, uprkos svemu ili baš zbog toga.

Nekako u isto vrijeme bh. mediji objavili su izjavu jednog ovdašnjeg političara koji nam svima poruči da smo u blatu (naravno, političar ovdašnji ne spomenu da je stvaranju kaljuže svesrdno doprinio).

Ne, nije mi njegova izjava pokvarila radost zbog onog teksta o kompaniji *Bekto*... Naime, ne znam za vas, ali ja, političarima ovdašnjim odavno ne vjerujem, ne uzimam ih ozbiljno i iskreno žalim ljude koji svoje slobodno vrijeme troše razglabajući šta je rekao ovaj, a šta mu je odgovorio onaj (političar ovdašnji).

No, vrlo pažljivo pročitam šta kažu i šta imaju reći uspješni biznismeni iz BiH. Iz vrlo jednostavnog razloga, za razliku od političara ovdašnjih, koji se valjaju u blatu i prepoznajemo ih, a sutra ćemo ih pamtiti (ako uopće) po ničemu, uspješne biznismene iz BiH prepoznajemo po uspjehu njihovih kompanija, koje uinat političarima ovdašnjim, rade i opstaju ne samo na bh, regionalnom, nego i na svjetskom tržištu.

Znam da bi gomili nerealiziranih ljekara, pravnika, ekonomista, historičara koji su politiku shvatili kao mogućnost da se realiziraju (prvenstveno u finansijskom smislu, naravno) bilo puno lakše da kolektivno pristanemo na blato u kojem se oni valjaju (o metaforama ne bih, ovoga puta).

No, sve dok ima onih koji na to ne pristaju, ja ću biti optimista, radovat ću se uspjehu svake kompanije i svakog privrednika iz BiH, kupovat ću domaće proizvode (bez obzira što imaju lošiju ambalažu i marketing od onih bjelovjatskih)... Uinat ili baš zbog, političara ovdašnjih... **B**

Aida Delić,
glavna i odgovorna urednica